

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
KANTONALNI SUD U ZENICI  
Broj: 43 0 K 265457 26 Kž 3  
Zenica, 19.02.2026. godine

U IME FEDERACIJE BOSNE I HERCEGOVINE!

Kantonalni sud u Zenici, u vijeću sastavljenom od sudije Tešnjak Nermina, kao predsjednika vijeća, te sudija Maličbegović Enesa i Bajramović-Softić Amele, kao članova vijeća, uz sudjelovanje zapisničarke Telalović Jele, u krivičnom predmetu protiv optuženog B.A., zbog produženog krivičnog neovlaštena proizvodnja i stavljanje u promet opojnih droga iz člana 238. stav 1. KZ FBiH, povodom žalbe Kantonalnog tužilaštva Zenica, broj: T04 0 KTŽ 0065749 26 od 28.01.2026.godine, izjavljene protiv presude Općinskog suda u Zenici, broj: 43 0 K 265457 25 K od 16.01.2026. godine, u sjednici vijeća, održanoj dana, 19.02.2026. godine, donio je, sljedeću:

**P R E S U D U**

**Uvažava se** žalba Kantonalnog tužilaštva Zenica, **preinačava se** presuda Općinskog suda u Zenici, broj: 43 0 K 265457 25 K od 16.01.2026. godine, u odluci o krivično-pravnoj sankciji, tako što se optuženi B.A., zbog produženog krivičnog djela neovlaštena proizvodnja i stavljanje u promet opojnih droga iz člana 238. stav 1. u vezi sa članom 55. KZ FBiH, primjenom ove odredbe, te člana 49. KZ FBiH, **OSUĐUJE NA KAZNU ZATVORA U TRAJANJU OD 6 (ŠEST) GODINA.**

Žalba optuženog se odbija kao neosnovana.

U ostalom dijelu prvostepena presuda ostaje neizmjenjena.

**O b r a z l o ž e n j e**

Prvostepenom presudom Općinskog suda u Zenici, broj: 43 0 K 265457 25 K od 16.01.2026. godine, optuženi B.A. oglašen je krivim zbog produženog krivičnog djela neovlaštene proizvodnje i stavljanje u promet opojnih droga iz člana 238. stav 1. u vezi sa članom 55. KZ FBiH, te je osuđen na kaznu zatvora u trajanju od 4 (četiri) godine i 6 (šest) mjeseci, a u koju kaznu se optuženom uračunava vrijeme provedeno u pritvoru, počev od 18.09.2025. do upućivanja istog na izdržavanje kazne zatvora.

Prvostepenom presudom od optuženog je izvršeno oduzimanje predmeta koji su povezani sa krivičnim djelima, dok je isti oslobođen od obaveze plaćanja troškova krivičnog postupka.

Protiv prvostepene presude Kantonalno tužilaštvo Zenica i optuženi su izjavili žalbe zbog odluke o krivično-pravnoj sankciji.

U odgovoru na žalbu braniteljica optuženog je predložila da se žalba tužilaštva odbije kao neosnovana.

Ovaj sud je razmotrio žalbe Kantonalnog tužilaštva Zenica i optuženog, izjavljene protiv prvostepene presude, pa je nakon održane javne sjednice, te izvršenog uvida u cjelokupan krivični spis, odlučeno kao u izreci, a iz sljedećih razloga:

Kantonalno tužilaštvo Zenica smatra da prvostepeni sud optuženom nije izrekao odgovarajuću krivičnu sankciju, a s obzirom na količinu droge koja je oduzeta od optuženog. Osim toga, tužilaštvo navodi da prvostepeni sud u dovoljnoj mjeri nije cijenio raniju osuđivanost optuženog, zbog čega se predlaže izricanje strožije zatvorske kazne.

Nasuprot žalbe tužilaštva optuženi smatra da mu je prvostepeni sud izrekao previsoku kaznu zatvora, a posebno što je isti priznao počinjenje krivičnog djela, te izrazio kajanje i obećanje da ubuduće neće činiti krivična djela.

Žalba Kantonalnog tužilaštva Zenica je osnovana.

Tužilaštvo je osnovano ukazalo da prvostepeni sud optuženom nije izrekao odgovarajuću krivičnu sankciju, prvenstveno zbog količine opojne droge koja je oduzeta od optuženog, te zbog njegove ranije osuđivanosti. Kod optuženog je pronađena i oduzeta veća količina droge marihuane od najmanje 8.255,308 gr, te speeda od 1.297,8 gr.

Iz izvoda iz kaznene evidencije PU I Zenica od 19.09.2025. godine vidi se da je optuženi do sada tri puta osuđen za različita krivična djela.

Dakle, bez obzira što je optuženi priznao počinjenje krivičnog djela, te izrazio kajanje, oduzeta veća količina droge, kao i ranija osuđivanost, ukazuju na to da se svrha kažnjavanja prema optuženom jedino može postići kaznom zatvora.

Uzimajući prednje okolnosti u obzir, kao i način, težinu i posljedicu počinjenog krivičnog djela, smatramo da kazna zatvora u trajanju od četiri godine i 6 mjeseci, nije odgovarajuća krivična sankcija prema optuženog, zbog čega je ovaj sud izvršio intervenciju, te preinačio pobijanu presudu, a kako je to bliže navedeno u izreci.

Uvažavanjem žalbe tužilaštva u pogledu krivično-pravne sankcije, žalba optuženog je postala bespredmetna, pa samim time je odbijena kao neosnovana.

Prema stavu ovog suda, kazna zatvora u trajanju od 6 godina je adekvatna krivična sankcija u odnosu na sve utvrđene okolnosti, te se istom postiže, kako opšta, tako i specijalna prevencija, a shodno članu 7. KZ FBiH.

Radi svega navedenog, odlučeno je kao u izreci, a shodno članu 329. stav 1. ZKP FBiH.

Zapisničarka

Telalović Jela

Predsjednik vijeća

Tešnjak Nermin